

# Gia ina vegliadetgna da pensiun

San Murezzan 2017 e las medaglias

DA GION NUTEGN STGIER / ANR

■ **Ina part impurtanta dals Campiunadis mundials da skis è er tut las ceremonias che han lieu enturn quella occurrenza. Per quellas segna Tanja Hengartner. Ella ha er contacts tar Surses, cun avair fatg tar Savognin Turissem in praticum.** En il center da San Murezzan 2017 stattan bain las 11 cursas, dentant er tut ils events a l'ur duessan procurar che l'occurrenza daventa ina aventura. Vegl e giuven, indigen ubain giast, tuts duessan turnar a chasa e raquintar da l'ambianza a Salastains, en vischnanca ed en mintga chantun. Per l'uschenumnà program lateral dals Campiunadis mundials da skis è responsabla *Tanja Hengartner*. La dunna, ch'è

er commembra dal comité d'organisa-ziun, enconuschan ins er en Surses. Suentar la matura e durant il temp ch'ella ha fatg ina scolaziun da turissem ha Hengartner fatg in praticum dad in onn tar Savognin Turissem. Ultra da quai mainan ses geniturs gia blers onns e quai cun success il «Roggi's Beizli» en il territori da skis a Savognin.

## Suentar il december 2015

Hengartner è ina da las 50 personas ch'appartegnan al comité che segna per l'entira organizaziun da quella occurrenza sportiva. Sche tgenina è stada la via per insumma vegnir tar quel job scu «event managerin»? Hengartner ha ditg che quella piazza saja stada scritta or avant passa dus onns e sin quel inserat

saja ella s'annunziada. Ella haja già plaschair da survegnir quella piazza che saja bain ina vaira sfida, però ina fitg interessanta e vasta lavur. Dapi il december 2015 è Hengartner pli u main mintga di occupada cun sia professiun sco manadra da tut las occurrenzas laterals da San Murezzan 2017.

## Prest di e notg program

Durant il di è a Salastains gronda festa e suenter las cursas cumenza la parti a San Murezzan. Quella cuzza savens fin la damaun baud, saja quai en las bleras bars, discotecas u er en ils hotels, nua che mintga naziun pli gronda ha albiert. Al «Kulm Park», là nua che l'avertura ha gi lieu e nua che la saira ha lieu la surdada da las medaglias, datti blers concerts cun furmazions nazionalas ed internaziunalas. Total stattan sin il program 35 liveacts da tut gener, cun la prioritad musica, sco cun la band «77 Bombay Street». Er occurrenzas culturalas mancan betg ed er in curs da rumantsch cumpiglia il program lateral. Quatter giadas sa preschenta la «Patrouille Suisse» cun ina vaira show d'avions, in vair spitachel. Fin che tut quels events èn stads fixads ha Hengartner bain gi blera lavur, quai ch'è er il cas durant l'occurrenza.

## Responsabla per la cerimonia da medaglias

In event ch'è in uschenumnà «highlight» per ella è bain la cerimonia festiva cun la surdada da las medaglias en il «Kulm Park». Hengartner ha da guardar che tut funcziunia e cunzunt er da procurar che las medaglias sajan prontas. Per in skiunz



Tanja Hengartner, ella segna per la realisaziun da tuts events laterals.

FOTOS G. N. STGIER



La finamaira da skiunzas e skiunzas a San Murezzan: Gudagnar ina da quellas medaglias.

u ina skiunza è la surdada da las medaglias bain il punct culminant da la carriera. Las medaglias da la FIS, cun simbol dad in cristall da naiv, datti suenter 1952 e quai per tut ils campiunadis mundials che stattan sut il segn da la FIS (ski alpin, nordic, snowboard etc.). Uschia han las medaglias cuntanschi quest onn cun 65 onns la vegliadetgna da pensiun. Per il disegn da quellas segna cun *Rolf Diggelmann* in artist svizzer e

per la producziun è la firma Faude & Huguenin, Le Locle, responsabla. Ina medaglia paisa 137 grams e revers è inscrit il lieu, l'onn da mintga campiunadi mundial e lura er mintgamai la disciplina. La basa da la medaglia dad aur è argent e la part dad aur giascha tar 17%. La valur reala dad ina medaglia è betg enconuschna, la valur simbolica dentant, quella è segir gronda per mintga sportist u sportista.

## FOTO DAL DI

### Segir betg mo decoraziun

(anr/gns) A San Murezzan glischan da preschent betg mo las medaglias dad aur ch'ils victurs e las victuras da las cursas survegnan, na, er cun guardar en las vitrinas da las bischutarias «Bucherer», «Cartier» e «Güblin», affars cun ina gronda collecziun dad uras, ellas n'èn segir betg mo decoraziun, mabain ellas vegnan er cumpradas.

pajais dal chaschiel e da la tschigulatta, na, ella è er ina marca sch'i va per uras. Tuts quels models, exponids en las vitrinas da las bischutarias «Bucherer», «Cartier» e «Güblin», affars cun ina gronda collecziun dad uras, ellas n'èn segir betg mo decoraziun, mabain ellas vegnan er cumpradas.



Quellas trais uras, marca «Rolex», custan tranter 30 000 francs e 46 000 francs.

FOTO G. N. STGIER

## Gieus Olimpics 2018 a PyeongChang

■ (anr/gns) Exact in onn avant l'entschatta dals Gieus olimpics en la Corea dal sid ha Swiss Olympic/Swiss Paralympic preschentà ier a San Murezzan ils criteris da selecziun per PyeongChang. Swiss Olympic quinta dad esser da la partida cun 170 atletas ed atlets, tants sco anc mai. *Ralph Stöckli*, il schef da missiun, ha ditg che per la selecziun quintian trais directivas: atlets ed atletas cun cler schanzas da far medaglias ubain in diplom, sportistas e sportistas cun in eventual potenzial da

far medaglias e lura records personals da mintga singul. Las emprimas selezioni fetschia Swiss Olympic vers la fin da mars da quest onn, la gronda part en il mais da december 2017 e las davosas ils 28 da schaner 2018, exact 12 dis avant l'avertura da l'occurrenza. 96% dals implants da sport sajan gia construdis a PyeongChang e situads sajan tuts en in conturn dal pli bler 42 km. Ina sfida saja per Swiss Olympic en l'Asia da chattar albiert, il nutriment, il privel dad infezioni ed ils transports.

## Mintgin lavura cun plaschair

Militar e protecziun civila en acziun

DA GION NUTEGN STGIER / ANR

■ **L'armada e la protecziun civila èn operativamain da gronda valur per ils organisaturs dals Campiunadis mundials da skis. Cunzunt quai che pertuga la construcziun da tut l'infrastructura e la regulaziun dal traffic prestan schuldads e civilists lavur exemplarica.** En il fratemp è oz gia il 5avel di dals Campiunadis mundials da skis. Per il militar e per la protecziun civila è quella occurrenza per varsaquants dis pli lunga. Gia en il decurs dal davos onn ed er dapi l'entschatta da quest onn èn schuldads ed ils umens da la protecziun civila fa-

tschentads cun da tuttas lavurs per l'occurrenza da skis da San Murezzan. Er da preschent en al lieu in pèr tschient persunas da quellas dus organizaziuns e quai da la damaun fin la saira.

### En acziun en plis lieus

La lavur dals schuldads è identica cun 10 000 dis da servetsch. Fatg bleras uras han ils schuldads cunzunt il temp da realisaziun da l'arena a Salastains, cun montar las tribunas e cun transports. L'emna passada cun la blera naiv nova èn ils schuldads stads en acziun cun rumir naiv a San Murezzan ed er en ils lieus vischins. Ch'il concept da traffic funcziuna è er in

grond merit da l'armada cun ella sustegnair ferm la polizia chantunala sch'i va per la regulaziun dal traffic. Er mancan betg helicopters, dus dal tip EC635 sco er in Super Puma èn preschents. La musica da militar, er quella dat als Campiunadis mundials da skis in maletg simpatic. Ils umens da la protecziun civila fan bunamain la medema lavur sco ils schuldads, er sche al lieu èn pli paucs del. En tut fa quella organizaziun 3000 dis da servesch be per ils organisaturs dals Campiunadis mundials da skis. Questa fin d'emna vegn cusseglier federal *Guy Parmelin* a visitar a San Murezzan las truppas da l'armada e da la protecziun civila.



A San Murezzan èn da vesair blers schuldads quels dis ed er anc l'emna proxima.

FOTO G. N. STGIER